



Rabu, 10 Pebruari 2021

Ogen: 2 Korinti 3:2-3



SURAT TERBUKA



Kita adalah Alkitab yang dibaca dunia, kita adalah kepercayaan yang dibutuhkan dunia, kita adalah khotbah yang dituruti dunia (Billy Graham). Kata motivasi si isuratken Billy Graham enda ngigetken kita ku bas tulisen Rasul Paulus man perpulungen Korinti pasal 3:2-3. I je nina Paulus, kam kap surat kami, si tersurat i bas pusuh kami si banci ioge kerina jelma. Enda me ikataken surat terbuka, banci ibaca doni enda. Bage Paulus ngerana man perpulungen Korinti erkiteken lit persoalen bas perpulungen e kerna kerasulen Paulus. Lit i tengah-tengah perpulungen e kalak Jahudi si la senang ngenehen Paulus si nai penganut agama Jahudi tulen tapi genduari enggo jadi pemberita si meriah kerna Kristus. La senang kalak Jahudi adi enterem jadi pengikut Kristus arah berita si ipeseh Paulus, e maka idamina dalam uga maka Paulus lanai nehken berita man perpulungen Korinti. Iajuk-ajukna perpulungen e lako mindo surat kerasulen Paulus, bagi sejenis surat rekomendasi, ise si nuruhsa Paulus reh ku kuta Korinti lako mberitaken kata Dibata. I bas ukur kalak Jahudi labo mungkin kalak Jahudi i Jerusalem nari mereken surat. Adi la terpedarat Paulus surat e emaka la banci ia nuriken kata Dibata ku kuta Korinti.

Njabab sienda maka ikataken Paulus, "kam kap surat kami." Pantekna perpulungen i Korinti e sada bukti kerasulen Paulus. Kesah si Badia si erdahin seh maka tek ia man Jesus arah berita si ibabana, Kesah si Badia nge si erbahansa perpulungen e tek. Adi pendahin Kesah si Badia, ise pe labo ngasup ngolangisa, sebab kesah e erdahin i bas pusuh manusia. Jadilah kita surat si terbuka, si banci ioge kerina jelma. Tuduhkanlah arah teptep perkatan ras perbahanenndu, kam pengikut Kristus.